di provision a la camera di lì, et poi presa Cremona sempre è stato di qua. Hor smontato di barcha di le poste, vene corando in palazo con alegra ciera dicendo: « Brexa è presa » e tutta la corte fo piena di brigata et in camera dil Principe, mandato per sier Alvixe Pixani savio a terra ferma et aperte le letere di eri a hore 12. Come il provedador Griti intrava in Brexa, et il modo come lo dirò di soto, unde di tanto jubilo subito fu mandato a dir a l'orator dil Papa, a l'orator dil vicerè di Napoli, a li oratori sguizari, al signor Frachasso di San Severino, al signor Alberto da Carpi, al patriarcha nostro, a tutti procuratori e conseieri e savii dil Colegio e altri degni senatori, adeo la terra fo piena, et tuti jubilava, et jo l'intisi per messo di sier Zacaria Dolfin mio cugnado, che mandò a dir tal nova optima e di grandissima importantia, et per le strade si cridava: « Brexa, Brexa » con grandissimo gaudio e alegreza. E in questa note il Principe fe' scriver una letera in campo soto Bologna con questo aviso, et a l'orator nostro a Roma acciò lo dichi al Papa subito, et fo expedito le letere.

A di 5 adoncha, la matina per tempo, molti di Colegio reduti in camera dil Principe, et alegratosi con Soa Serenità, et etiam altri vi andoe, tra li qual sier Nicolò Michiel procurator, et io Marin Sanudo con lui, et mi alegrai con il Principe, et ivi coram omnibus fo leto l'altra dil provedador Griti, qual è di questo tenor; data a di 3, a hore 12. Come a hore 5, si apresentoe il campo con le zente soto la terra, et da tre bande datoli la bataglia, la qual à durato fino quella hora, et da la porta di le Pille, il magnifico conte Alvixe Avogaro con li soi introe dentro con occision di molti de soi. Il populo di Brexa non à fato alcuna movesta nì demostration: et cussì col nome dil Spirito Sancto lui provedador et domino Zuan Paulo Manfron intrarono a hora in la cità per la porta di Santo Alexandro. Francesi coreno in la rocha e li nostri li son driedo. Et scrive che l'intrò con le zente d'arme etc. nè altre parole è in dita letera. Et di Alexandro Capella suo secretario, fo letere di hore 14 da Castegnedolo, co-. me in quella hora il provedador è intrato nel revelin di Brexa per la porta di Santo Alexandro.

Et vene etiam in camera dil Principe il prothonotario Mocenigo alegrandosi di tal felice aquisto, qual con effecto à grandissimo contento, perchè l' averà la sua abatia di Coniul che li dava ducati de intrada a l'anno, che zà tre anni non ha auto nulla et francesi la galdevano.

Veneno poi in Colegio e il reverendissimo pa-

triarcha nostro e l'orator pontificio episcopo de Ixernia, l' orator dil vicerè di Napoli domino Zuan Batista Spineli, li oratori di sguizari, quali spazono subito letere a li soi cantoni a solicitar veniseno zoso. Item, vene il signor Frachasso alegrandosi et oferendosi etc. Veneno etiam alcuni altri episcopi a congratularsi etc., sichè tuta la terra fo aliegra di tal optima nova; ma non fo sonato campane, nì fato altra demostration di festa. Fo scrito letere in Friul, a Treviso e per tutto di questo.

Da poi disnar, fo Pregadi. Et leto la dita letera et vene altre letere dil dito provedador Griti, date in Brexa a di 3, hore 22. Nara diffuse il modo de l'intrar, e come cavalchò atorno la terra et tutti cridava: « Marco, Marco » e brexani atorno di lui. Item, in castello è reduti li francesi, e Marco da Martinengo et Maria Alda fo moglie dil conte Zuan Francesco di Gambara con soi fioli, et ditti francesi hanno lasato li cavali di fuora, qual è stà tolti per li nostri, et dimanda 2 canoni per trar al Castello, et che si fazi subito provedador in Brexa, et si fazi cavalchar il governador Baion con le zente verso Brexa, perchè si averà altro. Item, manda una letera di missier Zuan Jacomo Triulzi scrive da Milan di a domino Hironimo Butisela podestà di Brexa, qual alias lexe a Padoa, come lauda il mandar di citadini li da Brexa; et che li manda 400 lanzichenech, et che l'acordo con sguizari è quasi fato; e altre particularità. Et scrive dito provedador Griti, è tante altre letere trovate, ch' è una corba, ma questa è de importantia. Serive altre particularità ut in litteris. a le qual mi riporto.

Noto: si ave, per do vie e di Brexa e di Mantoa, che la raina di Franza havia parturito uno fiol, et era subito morto; la qual raina non à fioli maschi che succedi al reame.

Dil governador zeneral, fo una letera data a Bonavigo. Si alegra con la Signoria nostra di la vitoria di Brexa, et scrive alcuni discorsi, e come è richiesto dal provedador Griti, e l'opinion sua quello saria da far et non perder tempo etc., et

Di sier Matio Sanudo pagador, vidi letere da Bonavigo, di 4, hore 3 di note. Come questa matina scrisse doe parole di l'aquisto di Brexa: Idio sia ringratiato. Et di dito aquisto si ha in varii modi, et dil provedador Griti non si ha distintamente, però 244* ch' el scrive su brevità; ma di Mantoa in questa hora ho auto: come a li 2 di note venendo a di 3 a hore 4 di note, si apresentò soto la terra dove da più canti il provedador con le zente soldate teniva a bada li inimici che si difendeva sopra le mure, e da l'al-